

ṢAḤĪḤ AL—BUKĤĀRĪ: KITAB ḤADĪTH YANG DISUSUN PADA ABAD KETIGA HIJRAH

oleh
Mohd. Napiah bin Abdullah

Imam Bukhari

Ṣaḥīḥ al-Bukhārī merupakan salah sebuah kitab Ḥadīth yang tinggi nilainya yang dihasilkan oleh sarjana Ḥadīth pada abad ke tiga Hijrah.¹ Ia disusun oleh Muhammad bin Ismā'īl bin Ibrāhīm bin al-Mughīrah bin Bardizbah al-Ju'fī.² Beliau dilahirkan pada tahun 194 Hijrah³ di sebuah bandar bernama Bukhārā⁴ dan wafat pada tahun 256 Hijrah⁵ di suatu tempat bernama Khartank.⁶ Muḥammad bin Ismā'īl lebih dikenali dengan panggilan al-Bukhārī yang dinisbahkan kepada tempat lahirnya iaitu Bukhārā. Beliau juga dikenali dengan panggilan al-Ju'fī kerana datuknya al-Mughīrah memeluk agama Islam melalui Ju'fī bin Sa'd. Oleh itu, al-

¹Kitab-kitab Ḥadīth lain yang dihasilkan pada abad ketiga Hijrah, antaranya ialah *Ṣaḥīḥ Muslim*, *Sunan al-Nasa'ī*, *Sunan Abu Dawūd*, *Sunan al-Tirmidhi* dan *Sunan Ibn Majah*, lihat Subhī al-Salih, *ʿulum al-Ḥadīth wa Mustalahuhu*, cetakan 5 (Bayrūt: Dār al-ʿilm Li al-Malayin, 1959), h. 48.

²Shihāb al-Dīn Abu Fadl Ahmad ibn ʿAlī Ibn Hajar al-ʿAsqalānī, *Tahdhīb, al-Tahdhīb* 12 jilid (Hayderabad: Matba'ah Dā'irat al-Ma'arif 1325-27; cetakan ulangan dengan foto Bayrut: Dār Sādīr, t.tkh), 9:47.

³Abd al-Rahmān ibn Abū Bakr al-Suyūṭī, *Ṭabaqāt al-Huffāz*, ed. ʿAlī Muḥammad ʿUmar (al-Qahirah: Maktabah Wahbah, 1975), h. 249 dan al-Dhahabī, *Tadhkirat al-Huffāz*, 4 jilid (Bayrūt: Dār Ihya' al-Turāth al-ʿArabi, 1956), 2:555.

⁴Bukhārā ialah sebuah bandar yang terletak di Khurasan. lihat Yā'qut ibn ʿAbdullah al-Hamawī, *Muʿjam al-Buldān*, 5 jilid (Bayrūt: Dār Sādīr, 1957), 1:352.

⁵Ibn Hajar, *Tahdhīb al-Tahdhīb*. 9:48 dan al-Suyūṭī, *Ṭabaqāt al-Huffāz*, h. 249.

⁶Kartank ialah sebuah daerah terletak di dalam Samarqand. Lihat Abū Shams al-Dīn Ahmad ibn Mahmud, *Wafayāt al-Aʿyān wa anbā'abnā al-Zamān*, ed. Iḥsān ʿAbbās, 7 jilid (Bayrūt: Dar al-Thaqāfah, 1972) 4:191.

Ju^cfi adalah dinisbahkan kepada Ju^cfi.⁷

Keluarganya adalah dari kalangan orang-orang yang berilmu pengetahuan dan bertaqwa. Tetapi anak yang sangat baik otaknya dan tajam fikirannya itu telah mengalami penderitaan yang pahit pada waktu kanak-kanak lagi. Pada usianya 6 tahun, ayahnya yang sangat dicintai itu telah meniggal dunia sekaligus menjadikannya anak yatim. Oleh itu, beliau diasuh oleh ibunya.

Imam Bukhari melibatkan diri dalam pengajian Ḥadīth pada masa usianya kurang dari sepuluh tahun.⁸ Keinginannya untuk menambah ilmu pengetahuan terutama dalam Ḥadīth semakin meningkat, oleh itu, beliau sentiasa berulang alik bertemu tokoh-tokoh Ḥadīth yang terdapat di tempat lahirnya seperti Muhammad bin Sallām al-Bīkandī, Muhammad bin Yūsuf al-Bīkandī, ^cAbdullah bin Muhammad al-Musnidi dan Harun al-Ash^cath.⁹ Apabila usianya 16 tahun, beliau telah menghafaz kitab yang disusun oleh ^cAbdullah bin Mubarak dan Waki' bin al-Jarrāh, di samping telah memahami pendapat-pendapat ahli fikiran.¹⁰ Dalam usia yang sama, imam Bukhari bersama emak dan saudaranya Ahmad telah pergi ke Mekah untuk menunaikan ibadat haji. Emak dan saudaranya pulang ke Bukhārā setelah menunaikan ibadat haji tetapi imam Bukhari terus menetap di Mekah untuk melanjutkan pelajarannya dalam Ḥadīth.¹¹

Di Mekah imam Bukhārī telah mempelajari Ḥadīth daripada ahli-ahli Ḥadīth yang masyhur seperti Abū al-Walīd Ahmad bin Muhammad al-Azraqi dan Ismā^cil bin Salim. Kemudian imam Bukhārī menziarahi kota Madinah untuk bertemu dengan ahli-ahli Ḥadīth di sana, di samping menziarah kubur Rasulullah (s. ^ca. w.).¹² Sewaktu berada di Madinah, beliau telah mula menunjukkan bakatnya dalam lapangan penulisan yang mana beliau telah mula menulis kitab yang berhubung dengan peristiwa-peristiwa hukum di zaman sahabat dan tabi'in, kemudian diikuti dengan kitab yang

⁷ al-Mubārak ibn Muhammad ibn al-Athīr; *Jāmi' al-Usūl fi Ahadīth al-Rasūl*, 11 jilid, ed. ^cAbd al-Qadīr al-Arnawū^t (s. 1.: Maktabah Dar al-Bayan, 1969), 1:185.

⁸ al-Suyūṭī, *Ṭabaqāt al-Huffāz*, h. 248.

⁹ Abd al-Wahāb ibn ^cAli al-Subkī, *Ṭabaqāt al-Shāfi'iyah al-Kubrā*, ed. ^cAbd al-Fatāh Muhammad dan Mahmud Muhammad al-Tanahi, 7 jilid (Misr: ^cIsa al-Bābī al-Halabī, 1969), 2:213.

¹⁰ Ibn Hajar, *Hady al-Sārī li Fath al-Bārī: Muqaddimah Sharh Sahīh al-Bukhārī* (Misr: al-Matba^cah-Kubrā al-^cAmiriyyah, 1901) h. 479.

¹¹ Ibid., h. 478

¹² Abd al-Majīd al-Husaynī, *al-Imām al-Bukhārī Muhaddīthan wa Faqīhan* (al-Qāhirah: al-Dār al-Qawmiyyah, n.d.), h. 28.

memperkirakan berkenaan perawi-perawi Ḥadīth sama ada perawi-perawi itu *thiqah*¹³ atau tidak *thiqah* yang dinamakan *al-Tarikh'al-Kabir*. Ini semuanya dilakukan di kota Madinah sebelah kubur Rasulullah (s.ᶜa.w.) di waktu malam di mana bulan menyinari alam.¹⁴

Setelah menetap di Madinah beberapa lama, imam Bukhari ingin meluaskan ilmu pengetahuannya berhubung dengan Ḥadīth. Oleh itu, beliau telah mengembara ke beberapa tempat seperti Balakh, Marw, Naisabur, al-Ray, Baghdad, Basrah, Kufah, Wasit, Hams, 'Asqalani dan Dimashq.¹⁵ Di tempat-tempat ini, beliau telah berkesempatan bertemu dan mempelajari Ḥadīth daripada tokoh-tokoh Ḥadīth di sana.

Satu perkara yang perlu disebut di sini ialah imam Bukhari mempunyai kekuatan ingatan dan hafalan yang sungguh istimewa, jika dibandingkan dengan orang-orang lain. Hal ini terbukti dari satu ujian yang dihadapkan oleh ulama Baghdad kepadanya untuk menguji kekuatan ingatannya iaitu sewaktu beliau sampai di sana, beliau telah ditemui oleh ulama Baghdad dan mereka memintanya mengadakan satu pertemuan ilmiah. Setelah dipersetujui, merekapun menentukan beberapa orang ahli Ḥadīth yang terkenal supaya hadir ke majlis itu. Sebelum sampai masa yang ditetapkan, ahli-ahli Ḥadīth tadi telah memilih seratus Ḥadīth yang telah dicampur-adukan di antara matan satu Ḥadīth dengan sanad Ḥadīth yang lain, kemudan seratus Ḥadīth tersebut dibahagikan kepada sepuluh orang ahli Ḥadīth. Setelah sampai masa yang dijanjikan maka sepuluh orang ahli Ḥadīth itupun bertanya kepada imam Bukhari dengan cara bergilir-gilir iaitu setiap orang bertanya sepuluh soalan. Setelah habis sepuluh soalan orang pertama berpindah pula kepada orang kedua hinggalah sampai sepuluh orang. Imam Bukhari menjawab soalan pertama bagi orang pertama ialah: "Aku tidak tahu". Begitu juga dengan soalan-soalan seterusnya. Demikian juga jawabannya kepada penyoal-penyoal kedua, ketiga sampai ke sepuluh orang. Apabila sepuluh orang selesai menyoalnya, imam Bukharipun mengulangi semula soalan-soalan itu sebagaimana yang mereka lafazkan, kemudian mengembalikan semula semua sanad-sanad Ḥadīth kepada matan-matan yang asal dengan tidak ada silap walaupun sedikit.¹⁶ Menurut Ibn Hajar apa yang lebih meng-

¹³ Perkataan *thiqah* ialah bermaksud seseorang perawi Ḥadīth bersifat dengan adil dan dabit. al-Suyuti, *Tadrib al-Rawi fi Sharh Taqrīb al-Nawawī*, ed. ᶜAbd al-Wahab ᶜAbd al-Latif, 2 jilid. cetakan 2 (al-Qahirah: Dar al-Kutub al-Ḥadīthath, 1966) 1:63.

¹⁴ Ibn Ḥajar, *Hady al-Sārī*, h. 479.

¹⁵ al-Subkī, *Tabaqāt al-Shāfi'īyah*, 2:213-214.

¹⁶ Ibn Hajar, *Hady al-Sārī*, h. 487, Ibn al-Athīr, *Jāmi' al-Usūl fi Ahadīth al-Rasul*, 1:186 dan Ibn Khallikan, *Wafayat al-A yān*, 4:189.

hairankan ialah bagaimana imam Bukhari dapat menghafaz sanad-sanad dan matan-matan Ḥadīth yang telah dicampur-adukan itu satu persatu dari soalan pertama hingga ke soalan yang ke seratus sebagaimana yang mereka ucapkan. Adapun kebolehannya menghafazkan Ḥadīth-ḥadīth bersama sanadnya yang asal adalah tidak menghairankan lantaran beliau adalah seorang yang ḥāfiẓ.¹⁷

Setelah beberapa percubaan untuk mencari kelemahan imam Bukhari di dalam Ḥadīth menemui kegagalan, maka ini menambahkan lagi kemasyhurannya dalam Ḥadīth sehingga setiap tempat beliau berada, ramailah para ulama sama ada daripada ahli-ahli Ḥadīth atau ulama lainnya meminta beliau memberi kuliah berhubung dengan Ḥadīth.¹⁸

Imam Bukhari telah memberi sumbangan yang sungguh bernilai kepada umat Islam dengan hasil-hasil karyanya yang begitu banyak. Antara hasil-hasil karya imam Bukhari ialah:

1. *Qadāyā al-sahābah wa-Ṭabīʿīn*.
2. *Rafʿ al-Yadayn fi al-ṣalāh*.
3. *Qirāʾat Khalīf al-Imām*.
4. *al-Tafsīr al-Kabīr*.
5. *al-Musnad al-Kabīr*.
6. *al-Adab al-Mufrad*.
7. *al-Duʿafāʾ*.
8. *al-Hibah*.
9. *Asāmī al-sahābah*.
10. *Kitāb al-Mabsut*.
11. *Kitāb al-ʿilal*.
12. *Kitāb al-Fawāʾid*.
13. *Ṣaḥīḥ al-Bukhārī*.¹⁹

Di antara hasil-hasil karya imam Bukhari itu yang paling masyhur di kalangan umat Islam ialah *Ṣaḥīḥ al-Bukhārī* yang mana nama asalnya ialah *al-Jamīʿ al-Ṣaḥīḥ al-Musnad min Ḥadīth Rasūlillāh sallallāh ʿalayhi wa sallam wa Sunanihi wa ayyāmihī*.²⁰ Kitab ini menjadi rujukan kepada orang-orang Islam hingga sampai sekarang.

¹⁷ Ibn Ḥajar, *Hady al-Sārī*, h. 487.

¹⁸ Ibid., h. 487-488.

¹⁹ Ibn al-Nadīm, *al-Fihrist*, 1:555, Ibn Ḥajar, *Hady al-Sārī*, h. 492-493, Brockelmann, *Tarikh al-Adab al-ʿArabi*, tj. ʿAbd al-Halīm al-Najjar 3 jilid, cetakan 2 (Misr: Dar al-Maʿarif, 1963), 3:165-181.

²⁰ Ibn Ḥajar, *Hady al-Sari*, h. 6.

SahĪb Āl-BukhārĪ

Adapun tujuan utama imam Bukhari menyusun *ṢaḥĪhnya* ialah untuk mengumpul HadĪth-ḥadĪth yang *ṣaḥĪh*²¹ sahaja.²² *Kitab-kitab HadĪth yang disusun sebelumnya adalah bercampur di antara HadĪth yang ṣaḥĪh dengan HadĪth yang tidak ṣaḥĪh*. Susunan seumpama ini tentulah menyudahkan orang-orang yang bukan ahli di dalam bidang HadĪth untuk membezakan antara HadĪth yang *ṣaḥĪh* dengan HadĪth yang tidak *ṣaḥĪh*.²³ Ahli-ahli HadĪth sebelumnya juga hanya menyusun HadĪth-ḥadĪth yang terdapat di wilayah masing-masing seperti Ibn Juraij mengumpul HadĪth-hadĪth yang terdapat di Mekah, al-Azẓā'ī mengumpul HadĪth-hadĪth yang terdapat di Syam, Sufyan bin Sa'īd mengumpul HadĪth-ḥadĪth yang terdapat di Kufah dan Abu Salamah pula mengumpul HadĪth-ḥadĪth yang terdapat di Basrah.²⁴ Oleh itu pengumpulan mereka tidak meliputi HadĪth-ḥadĪth yang ada di wilayah-wilayah Islam pada masa itu.

Semua perkara di atas merupakan daya penggerak kepada imam Bukhari untuk mengumpul HadĪth-ḥadĪth yang *ṣaḥĪh* sahaja. Keinginan beliau diperkuat lagi oleh cadangan gurunya; Ishāq bin Rāhawih yang berucap di hadapan murid-muridnya, katanya: "Alangkah baiknya jika kamu semua dapat mengumpul sebuah kitab HadĪth yang ringkas mengandungi HadĪth-ḥadĪth yang *ṣaḥĪh*²⁵ Selepas itu imam Bukhari pun mula mengumpul *ṣaḥĪhnya* sebagaimana yang diterangkan oleh beliau sendiri, katanya: "Maka tergeraklah di dalam hatiku dengan cadangan itu lalu aku mula mengumpul HadĪth *al-Jamī' al-ṢaḥĪh*."²⁶

Imam Bukhari mula mengumpul dan menyusun *ṣaḥĪhnya* semasa beliau berada di masjid al-Haram dan beliau tidak memasukkan sesuatu HadĪth ke dalamnya kecuali setelah beliau mengambil air sembahyang dan sembahyang dua rakaat terlebih dahulu.²⁷ Beliau mengambil masa 16 tahun

²¹HadĪth ṢaḥĪh ialah HadĪth yang berhubung segala perawinya dari awal yang meriwayatkan HadĪth hinggalah kepada Rasulullah (s.a.w.). Perawi-perawi itu hendaklah bersifat dengan *thiqah*, tidak mempunyai *shādh* dan 'illah, al-Suyūṭī, *Tadrīb al-Rāwī*, 1:63.

²²Ibn Ḥajar, *Hady al-Sārī*, h. 5.

²³Muhammad Abū Zahw, *al-HadĪth wa al-Muhaddithūn* (Misr: Sharikat Musahamah Misriyah, 1958), 377-378.

²⁴Ibn Ḥajar, *Hady al-Sārī*, h.4.

²⁵Ibid., h.5.

²⁶Ibn Ḥajar, *Tahdhīb al-Tahdhīb*, 9:49.

²⁷Ibn Ḥajar, *Hady al-Sārī*, h. 490.

untuk menyelesaikan susunan *ṣaḥīḥnya* dan Ḥadīth-ḥadīth yang terkandung di dalamnya adalah berasal dari 600,000 Ḥadīth.²⁸ Setelah selesai menyusun *ṣaḥīḥnya*, beliau mengemukakannya kepada imam Ahmad bin Hanbal, Yahyā bin Mu^cīn, ^cAlī bin Madinī dan lain-lain lagi. Kesemua mereka memperakui susunan dan kesahihan Ḥadīth-ḥadīth yang terkandung di dalam *ṣaḥīḥnya*.²⁹

Imam Bukhari membahagikan kitab *ṣaḥīḥnya* kepada 97 *kitāb*.³⁰ Kitāb-kitāb itu mengandungi tajuk-tajuk kecil yang dinamakan *bāb* berjumlah 3,450 *bāb*.³¹ Ahli-ahli Ḥadīth menamakan tajuk-tajuk bab ini sebagai *terjumah*. *Terjumah-terjumah* yang terdapat di dalam *Ṣaḥīḥ al-Bukhārī* itu sebenarnya menunjukkan kecerdikannya yang luar biasa dan kefahamannya yang luas terhadap *al-Qur'ān* dan *al-Sunnah*, di samping kematangannya di dalam mengeluarkan hukum-hukum (*Istinbāt al-aḥkām*). Perbuatan ini menunjukkan bahawa *al-Qur'ān* dan *al-Sunnah* itu tidak dapat dipisahkan darinya sehingga beliau boleh menggunakan keduanya bila-bila masa sahaja apa-apa yang dikehendaki.

Dalam *Ṣaḥīḥ al-Bukhārī* terdapat Ḥadīth-ḥadīth yang berulang dari segi lafaznya tetapi berlainan dari segi sanad (*wajh*) dan perawi-perawinya. Pengulangan seperti ini mempunyai maksud-maksud tertentu, antaranya ialah:

1. Ḥadīth-ḥadīth itu diulang supaya ia tidak termasuk di dalam Ḥadīth Gharīb³² umpamanya Ḥadīth yang telah diriwayatkan oleh seorang sahabat, kemudian diriwayatkan Ḥadīth yang sama di tempat lain melalui riwayat sahabat yang lain.³³
2. Ḥadīth-ḥadīth itu diulang supaya menghilangkan keraguan terhadap perawi. Contohnya sebuah Ḥadīth yang diriwayatkan oleh sebahagian perawi dengan lengkap tetapi terdapat perawi lain meriwayatkannya secara ringkas.³⁴

²⁸Ibid.

²⁹Ibid., h. 5.

³⁰A.J. Wensinck, *A Handbook of Early Muhammadan Tradition* (Leiden: E.J. Brill, 1971), x11—X11.

³¹Abū Shahbah, *A^clām al-Muhaddithīn* (Misr: Markaz al-Kutuḅ al-Sharq al-Awsāt, n.d.), h. 123.

³²Ḥadīth Gharīb ialah Ḥadīth yang diriwayatkan oleh seorang perawi di dalam satu lapisan perawi atau lebih. Lihat Ibn Hajar, *Sharḥ Nukḥbat al-Fīkr* (Misr: Mustafā al-Bābī al-Halabī, 1934), h. 7-8.

³³Ibn Hajar, *Hady al-Sārī*, h. 12.

³⁴Ibid., h. 12 - 13.

3. Ḥadīth-ḥadīth itu mengandungi beberapa makna yang ada perbezaan di antara satu dengan lain. Oleh itu, setelah diriwayatkan Ḥadīth itu di dalam satu bab maka diriwayatkannya pula Ḥadīth itu di dalam *bāb* yang lain dengan sanad yang lain.³⁵
4. Ḥadīth-ḥadīth itu diulang kerana ia tidak sependapat di antara ahli-ahli Ḥadīth sama ada ia *mawqūf*³⁶ atau *marfūʿ*³⁷ dan tidak diketahui mana yang *rajih*.³⁸

Sesungguhnya imām Bukhārī tidak menegaskan secara jelas syarat-syarat perawi Ḥadīth yang terdapat di dalam *Ṣaḥīḥnya*. Ahli-ahli Ḥadīth telah membuat kajian terhadap *Ṣaḥīḥnya* dan mereka dapati imam Bukhari mensyaratkan bahawa Ḥadīth-ḥadīth yang terdapat di dalamnya mestilah diriwayatkan oleh perawi-perawi yang *thiqah* sehingga sampai kepada peringkat sahabat dan sanad bagi Ḥadīth tersebut hendaklah berhubung (*muttasil*), dari awal sanadnya hinggalah sampai kepada sahabat yang meriwayatkan Ḥadīth itu daripada Rasulullah (s.c.a.w.).³⁹ Di samping perawi-perawi bersifat *thiqah* dan sanadnya *muttasil*, imām Bukhārī juga mensyaratkan para perawi itu sezaman dengan guru-guru mereka dan telah sabit bertemu di antara murid dan guru walaupun sekali sahaja.⁴⁰

Di atas, telah diterangkan syarat-syarat perawi Ḥadīth yang terdapat di dalam *Ṣaḥīḥ al-Bukhārī*, oleh itu, di dalam huraian selanjutnya akan diterangkan kedudukan Ḥadīth-ḥadīth yang terkandung di dalam *Ṣaḥīḥ al-Bukhārī*. Ahli-ahli Ḥadīth berpendapat bahawa Ḥadīth-ḥadīth yang terkandung di dalam *Ṣaḥīḥ al-Bukhārī* adalah Ḥadīth-ḥadīth yang *ṣaḥīḥ* sahaja. Perkara ini dapat dilihat daripada perkataan imam Bukhārī sendiri yang dipetik oleh Ibn Hajar, katanya: “Aku tidak meriwayatkan dalam kitabku ini kecuali Ḥadīth-ḥadīth yang *ṣaḥīḥ*.”⁴¹ dan seterusnya beliau berkata lagi: “Aku tidak memasukkan Ḥadīth-ḥadīth ke dalam-

³⁵Ibid., h. 12.

³⁶Mawqūf ialah apa-apa yang disandarkan kepada sahabat dari perkataan, perbuatan dan pengakuan, Ibn Hajar, *Sharh Nukhbat al-Fikr*, h. 30.

³⁷marfūʿ ialah apa-apa yang disandarkan kepada Rasulullah (s.a.w.) sama ada perkataan, perbuatan dan pengakuan, Ibn Hajar, *Sharh Nukhbat al-Fikr*, h. 30.

³⁸Ibn Hajar, *Hady al-Sarī*, h. 13.

³⁹Muhammad Tāhir, al-Maqdisī, *Shurūt al-ʿAimmah al-Sittah* (al-Qāhirah: Maktab al-Qudsī, 1357), h. 10-11.

⁴⁰Ibn Kathīr, *Ikhtisār ʿUlūm al-Ḥadīth* dalam *al-Bāʿith al-Hathīth* oleh Ahmad Muhammad Shākīr, h. 25.

⁴¹Ibn Hajar, *Hady al-Sarī*, h. 5.

nya sehinggalah aku beristikharah kepada Allah terlebih dahulu, kemudian aku sembahyang dua rakaat dan aku yakin akan kesahihan Hadīth itu".⁴²

Selain daripada kata-kata imam Bukhārī di atas, kesahihan Hadīth-hadīth di dalam *Ṣaḥīḥ al-Bukhārī* itu juga dibuktikan berdasarkan kepada nama asal bagi *Ṣaḥīḥ al-Bukhārī* iaitu *al-Jamīʿ al-Ṣaḥīḥ al-Musnad min Ḥadīth Rasūlullah ṣallāh ʿalayhi wa sallam wa sunanihi wa ayyamihi*.⁴³ Nama asal ini menunjukkan bahawa matlamat pengumpulan imam Bukhārī ialah Hadīth-hadīth Rasūlullah (s. c. a. w.) yang *ṣaḥīḥ* sahaja. Oleh itu, jika terdapat di dalam *Ṣaḥīḥ al-Bukhārī* Hadīth-hadīth yang tidak mencukupi syarat-syarat Hadīth *ṣaḥīḥ* maka Hadīth-hadīth tersebut di-riwayatkan sebagai *Mutabaʿah*⁴⁴ bukan matlamat pengumpulan imam Bukhari.⁴⁵

Sebagaimana telah diterangkan di atas bahawa imam Bukhārī telah mengumpul sebanyak 600,000 Hadīth pada peringkat awalnya tetapi setelah dikaji dengan teliti beliau hanya memasukkan 9,082 Hadīth sahaja di dalam *ṣaḥīḥnya* termasuk Hadīth-hadīth yang berulang. Bilangan ini tidak termasuk Hadīth yang *mawqūf* kepada sahabat dan *maqṭūʿ*⁴⁶ kepada tabiʿin.⁴⁷ Kalau dikira Hadīth-hadīth yang ada di dalam *Ṣaḥīḥ al-Bukhārī* yang *mawṣul* dengan tidak berulang ialah sebanyak 2,602 Hadīth dan Hadīth-hadīth yang *muʿallaq*⁴⁸ dan yang *murtuʿ* ialah 150 Hadīth.⁴⁹

Berdasarkan sifat-sifat yang terdapat pada *ṣaḥīḥ al-Bukhārī* di atas, kebanyakan ahli-ahli Hadīth menganggap *Ṣaḥīḥ al-Bukhārī* adalah kitab Hadīth yang paling *ṣaḥīḥ* di antara kitab-kitab Hadīth. Mereka memberi

⁴²Ibid., h. 490.

⁴³Ibid., h. 6.

⁴⁴*al-Mutabaʿah* ialah bersamaan seseorang perawi dengan perawi yang lain pada meriwayatkan sesuatu Hadīth. Lihat Muhammad ʿAjjāj al-Khatīb, *usūl al-Hadīth*, h. 360.

⁴⁵Muhammad ʿAjjāj al-Khatīb, *Usūl al-Hadīth*, ed. 2 (Bayrūt: Dār al-Fikr, 1971), h. 312-314.

⁴⁶*maqṭūʿ* ialah apa yang disandarkan kepada tabiʿin dari perkataan, perbuatan dan pengakuan, Subḥī al-Sāliḥ. *ʿUlūm al-Hadīth*, h. 209.

⁴⁷Ibn Ḥajar, *Hady al-Sārī*, h. 470;

⁴⁸*muʿallaq* ialah Hadīth yang diḥuṅg sanadnya seorang atau lebih, Ibn Ḥajar, *Hady al-Sārī*, h. 14.

⁴⁹Ibid., h. 478.

perhatian kepadanya dengan mempelajari, menghafaznya, di samping itu terdapat sebahagian mereka telah mensyarah dan menterjemahkannya ke bahasa lain selain bahasa Arab.

Ahli-ahli Hadīth yang mensyarah *Ṣaḥīḥ al-Bukhārī*, antaranya ialah:

1. Ahmad bin Muhammad al-Khattābī (w. 388H) dengan kitabnya *Aʿlām al-Muḥaddith*.
2. Muḥammad bin Yusuf al-Kirmānī (w. 786H) dengan kitabnya *al-Kawākib al-Darārī fi Sharḥ Ṣaḥīḥ al-Bukhārī*.
3. Ahmad bin ʿAlī Ibn Hajar al-ʿAsqalānī (w. 852H) telah menghasilkan sarah *Ṣaḥīḥ al-Bukhārī* yang terkenal iaitu *Fath al-Bari bi Sharḥ Ṣaḥīḥ al-Bukhārī*.

Ahli-ahli Hadith yang meringkas (*ikhtisār*) *Ṣaḥīḥ al-Bukhārī* antaranya ialah:

1. Ahmad bin ʿUmar al-Qurtubī (w 656H)
2. Hasan bin ʿUmar al-hilbī (w. 779H) telah menghasilkan kitabnya *Irshād al-Sāmiʿ wa al-Qārī al-Muntaqā min Ṣaḥīḥ al-Bukhārī*.
3. al-Ḥusayn bin al-Mubārak al-Zubaydī (w. 893H) dengan kitabnya *al-Tajrīd al-Shāriḥ li al-Aḥādīth al-Jāmiʿ al-Ṣaḥīḥ*.⁵⁰

Ṣaḥīḥ al-Bukhārī juga telah diterjemahkan ke bahasa lain, antaranya ialah Translation of the Meaning of *Ṣaḥīḥ al-Bukhārī* oleh Dr. Muhammad Muhsin Khan.

Berdasarkan penjelasan di atas dapatlah dibuat kesimpulan bahawa kebanyakan ahli Hadīth menganggap *Ṣaḥīḥ al-Bukhārī* adalah sebuah kitab Hadīth yang paling *ṣaḥīḥ* sekali di antara kitab-kitab Hadīth. Ia mengandungi Hadīth-hadīth yang *ṣaḥīḥ* sahaja. Oleh itu, orang-orang Islam hendak mengambil guna dari kitab Hadīth ini di dalam memahami ajaran-ajaran Islam supaya mereka beroleh kejayaan di dunia dan akhirat.

⁵⁰ untuk mendapat senarai yang lebih lengkap mengenai kitab yang mensyarah dan meringkas *Ṣaḥīḥ al-Bukhārī*. Lihat Ibn Khalifah, *Kashf al-Zunūn*, 1:545-555, Brockelmann *Tarikh al-Adab al-ʿArabi*, 3:167-178.